

欽定大清會典事例

欽定大清會典事例卷六百十九

兵部

綠營處分例

緝私

緝私。○順治年間定。地方行使廢錢。專汛官不查拏者。一起降二級調用。二起降四級調用。至三起者革職。○康熙十七年題准。大夥賣販私鹽。至十人以上。帶有軍器。專汛官徇縱不拏者。革職。兼轄官降二級調用。失察者。專汛官革職。留任。兼轄官降二級留任。皆限一年。緝拏獲半。即准開復。限滿不獲。專汛官革任。兼轄官降二

級調用。其本汛雖未拏獲。經別汛全獲。亦免議。不全獲者。仍照例議處。○又議准。官弁一年內拏獲十人以上。帶有軍器大夥私鹽者。一起紀錄一次。二起紀錄二次。三起加一級。四起加二級。至五起者。不論俸滿即升。兼轄官視其所屬。一年內有拏獲三起者。紀錄一次。六起紀錄二次。九起加一級。再有多者。照此遞加。○三十九年。覆准。私鹽拒捕。能全獲者。各官皆免議。若夥黨衆多。不能全獲。或獲二三名。及兵被殺傷。專兼各官。初叅免其處分。限一年緝拏。限滿不獲。

專汎官罰俸一年。兼轄官罰俸六月。統轄官罰俸三月。鹽犯照案緝獲。○四十四年議准。小夥販賣私鹽不及十人及十人以上不帶軍器者。專汎官失察一次降二級。二次降四級。皆留任。至三次者革職。兼轄官一次降一級。二次降二級。三次降三級。皆留任。至四次者降三級。調用。○雍正三年議准。地方私鑄錢及將制錢私毀。專汎官知情者革職治罪。失察者一起降三級。調用。二起革職。兼轄官一起降二級。二起降四級。皆調用。至三起者革職。統轄官一起降一級。

二起降二級。三起降三級。皆調用。至四起者革職。提鎮一起降一級。二起降二級。三起降三級。皆留任。四起降四級。調用。至五起者革職。如有從前失察。今能拏獲。不論年月遠近。免議。文職拏獲。同城之武職。並免議。交界之所。經別屬之員拏獲者。亦免議。其拏獲私鑄私毀。不論本管及別屬地方。一起紀錄一次。二起紀錄二次。三起紀錄三次。四起加一級。○又議准。經紀鋪戶將私錢販賣。攬和行使。不查拏之專汛官。一起降三級調用。二起革職。兼轄官一起降二級留

任。二起降四級調用。至三起者革職。統轄官一起降一級。二起降二級。皆留任。三起降三級調用。至四起者革職。提鎮一起罰俸一年。二起降一級。三起降二級。皆留任。四起降三級調用。至五起者革職。船戶夾帶私錢押船官知情者革職。失察者降三級調用。○六年議准。地方礦徒私自聚集。該管官知情隱匿者革職。平日失察及經發覺並不實力查拏。以致全無捕獲者。降三級調用。獲不及半者。降二級留任。限一年緝拏。全獲開復。限滿僅獲半者。降一級調用。獲不

及半者。降二級調用。未獲之犯。交與接任官照案緝拏。如一經發覺。比即獲犯過半。降一級留任。餘犯限一年緝拏。全獲開復。限滿仍止獲過半者。罰俸一年。餘犯照案緝拏。○十年議准。山東山西河南等省。出產硝磺。有結夥私行販賣者。不論出產及經過地方。失察之專汛官。照失察小夥私鹽例議處。船戶夾帶者。押船官照夾帶私鹽例議處。○乾隆六年議准。失察小夥私鹽。降級留任各官。限一年緝拏。限滿無獲。專汛官罰俸一年。兼轄官罰俸六月。各帶所降之級。

再限一年緝拏。限滿無獲。專汎官再罰俸一年。兼轄官再罰俸六月。各帶所降之級。鹽犯照案緝拏。○十四年奏准天津阿城淮安儀徵等處原係產鹽地方。該督撫轉飭地方營汎官弁。於糧船經過之時。嚴行稽察。舵丁水手應需食鹽。每船總不許過四十斤之外。如不實力稽察。以致舵丁水手夾帶過四十斤之外者。運官照例議處。該營汎官弁罰俸六月。○十六年議准。各省武職官弁。經上司委辦鹽務。即有緝私疏引之責。遇失察大小私鹽。將承辦官照專汎例議



處。總辦官照兼轄例議處。如拏獲大夥私鹽。照所獲起數分別議敘。○二十九年奏准。小夥興販私鹽不及十人。及十人以上不帶軍器者。專汛官失察一次降職一級。二次降職二級。三次降職三級。俱留任戴罪緝拏。一年限滿無獲。罰俸六月。各帶所降之級緝拏。限滿不獲。仍罰俸六月。各帶所降之級緝拏。拏獲之日。俱准其開復。失察四次降三級調用。兼轄官失察一次罰俸一年。二次降職一級。三次降職二級。俱留任戴罪緝拏。一年限滿不獲。罰俸三月。各帶所降

之級緝拏。限滿不獲。仍罰俸三月。各帶所降之級緝拏。拏獲之日。俱准其開復。失察四次降一級調用。如止失察經由。並無窩留販賣情事者。專汛官罰俸六月。○又奏准。鹽徒拒捕。不及十人。及十人以上。不帶軍器。致傷兵丁。不能擒獲者。專汛官降二級留任。兼轄官降一級留任。統轄官罰俸六月。俱戴罪緝拏。拏獲之日。開復一年。限滿不獲。專汛官罰俸一年。兼轄官罰俸六月。仍帶所降之級緝拏。統轄官罰俸一年。再限一年緝拏。限滿不獲。專兼各官。俱照所降之級

調用。統轄官罰俸二年。○又奏准興販私鹽十人以上。帶有軍器。失於覺察者。專汛官革職留任。兼轄官降二級留任。俱限一年緝拏。拏獲一半者。准其開復。不獲革職留任者。革任降級留任者。照所降之級調用。該督撫提鎮於失察官員不行題叅者。照徇庇例議處。○又奏准十人以上。帶有軍器。興販私鹽。失察武職各官。係本汛若已拏獲一半者。免議。其本汛並未拏獲。被別汛全獲者。專汛官仍革職留任。四年無過開復。兼轄官仍降二級留任。三年無過開復。若別

汎拏獲雖少一二人者。仍照失察大夥私鹽例議處。至限年緝拏之後。計未獲人數拏獲一半以上者。將拏獲各官原參降級革職留任之案。准其開復。未經拏獲各官。仍照二參例議處。若係別汎拏獲。仍照別汎拏獲例議處。○又奏准私梟黨衆十人以上。帶有軍器。官兵不能拏獲。或獲二三名。及兵被殺傷。專兼各官。照失察興販大夥私鹽例議處。統轄官降一級留任。○又奏准十人以上。帶有軍器。興販私鹽。縱放不行。擒拏者。專汎官革職。兼轄官降二級調用。該管

上司容隱不參。照徇庇例議處。○又奏准販私鹽梟由他處入境。督兵緝拏。拒捕殺傷或當場人鹽並獲。或於疏防限內拏獲過半者。該地方武職免其疏防處分。餘犯照案緝拏。隱諱不報者。照故縱鹽梟例議處。不知情者。照失察大夥私鹽例議處。○又奏准糧船過天津阿城淮安儀徵等處產鹽之鄉。每船止許向官鋪售買食鹽四十斤。如丁舵人等多行夾帶。該地方管汛員弁不行實力稽察。別經發覺。照不行詳查例罰俸一年。○又奏准營千總把總守備都司專

汛地方及衛所千總守備該管地方有私鑄錢  
文之人專管官知情故縱者。叅革治罪。不知情  
失於覺察者。每起降二級調用。遊擊叅將降一  
級調用。副將降一級留任。提督總兵罰俸一年。  
如該管地方經紀鋪戶有販賣私錢攬和行使  
不行查拏者。該管官每起降二級調用。兼轄官  
降一級留任。統轄官罰俸一年。提督總兵罰俸  
九月。如有從前失於覺察。現在能拏獲者。不論  
年月遠近。俱免其處分。文官拏獲將武職無論  
同城不同城。均各照本例議處。交界處所拏獲。

未經協拏之該管官。不准援免。如僅獲為從之犯。而首犯及匠人脫逃者。該管官照命案緝兇不力例扣限查叅。接緝官亦照接緝命案例辦理。○又奏准武職該管地方。有翦邊錢文攬和行使。失察之該管官。每起罰俸一年。○又奏准地方有姦民將制錢翦邊毀化至十千以上者。將失察之該管官。每起降二級調用。兼轄官每起降一級調用。統轄官每起罰俸一年。提督總兵。每起罰俸九月。不及十千者。該管官每起降一級調用。兼轄官每起降一級留任。統轄官每

起罰俸九月。提督總兵每起罰俸六月。如數止  
一千文以下者。該管官每起罰俸一年。其僅能  
拏獲從犯而首犯匠人未獲者。照本例酌減議  
處。如係文員拏獲。或交界處所拏獲。本汛武職  
並未協拏者。仍照本例議處。○三十七年奉

旨。地方私鹽承緝不嚴。官引必致壅滯。在江省各屬文  
武員弁。以所行乃浙省鹽斤。未免意存歧視。雖有緝  
私之名。不肯實力從事。而浙江鹽政。又以緝私官弁  
兵役。皆隔省所轄。呼應不靈。松所鹽務之疲。率由於  
此。浙江巡撫兼管鹽政。未嘗無考覈緝私之責。而令



不能行之江省。地方官往往陽奉陰違。因循已非一日。不知行鹽雖在他境。而銷引同屬辦公。司鹺者固不便因鹽務所在之區。越俎干預他事。其有關鹽政者。原可隨時覈計。如果江省地方官視緝私為具文。不知留心整頓。以致梟徒充斥。膜視誤公。即當指叅一二。予以應得處分。各員弁等自不敢仍前玩忽干咎。若僅如戶部所議。專責江省大吏督查。恐日久尚成故套。於浙鹽仍無裨益。嗣後松所緝私之事。除交江省督撫董飭各該省地方文武盡力嚴拏外。儻有稍分畛域。不肯實力緝私者。並准浙江巡撫覈實叅

奏。照例議處。該上司等亦難辭督率不嚴之咎。如此則江省有司。既無敢膜視卸肩。松所商人亦無由推託藉口。方為兩得。○四十四年奏准。私梟過境。並未。有在境販賣情事。於犯案之時。供出從何處興販。向何處私賣。僅止經由該處者。地方武職失於查察。係大夥經由。專管官每起罰俸一年。小夥經由。專管官每起罰俸六月。若經由該汛處所。遇有兵役追緝。鹽梟拒捕傷人。除失察出境。仍查取興販地方專兼職名外。其失察拒捕。不能協力擒拿。即將經由之地方專管兼轄統轄。

職名開送。係大夥拒捕者。照大夥拒捕之例辦理。係小夥拒捕者。照小夥拒捕之例辦理。○又奏准大夥私鹽拒捕。如於限內自行拏獲過半者。專汛官降二級留任。兼轄官降一級留任。統轄官罰俸一年完結。小夥私鹽拒捕。限內自行拏獲過半。專汛官降一級留任。兼轄統轄官俱罰俸一年完結。若犯由別汛全獲者。亦照此例辦理。其非自行拏獲過半者。仍照本例議處。○四十一年奏准。浙江省定海所屬內洋二十二島。酌設四廠。歸定海鎮標中軍收買餘鹽。如有

售私案件。查明由何舉私售。何汎出口。除縣屬  
內港十五舉開叅文職外。如在岱山內洋各舉  
即將營員廢弁作專管官開叅。照不實心稽察  
例降二級調用。其守口汎弁。亦照此例一體議  
處。五十八年奏准江西省建昌饒州等府私  
販出沒處所。俱選派文武員弁各一員。撥給鹽  
快兵丁各十名。於水陸分頭巡緝。半年一次更  
換。如能實力緝捕。銷引溢額。該撫等覈計分數。  
咨部查覈。限內銷引足額之外。多銷引一分以  
上。紀錄一次。二分以上。紀錄二次。三分以上。紀

錄三次。四分以上加一級。五分以上加二級。數多者以次遞加。如不實力查緝。以致額引短銷。不及一分者。罰俸六月。一分以上。罰俸一年。二三分降一級留任。四五分降一級調用。六分降二級調用。七分降三級調用。七分以上革職。○  
五十九年

諭。昨因京城錢價過賤。已降旨令各省督撫酌量情形。將每年應行搭放錢文之項。改放銀兩。或動撥閒款。將銀兩按照市價收買錢文。以期銀兩流通。錢價略長。而小錢亦可漸次杜絕。乃各省小錢。在在充斥。以

致錢價日賤。商民交累。豈可不力為整頓。小錢充斥。川省尤甚。近邊甯遠一帶。尚仍沿用小錢。根株未能淨絕。今值此甫經整頓之後。若能認真不避嫌怨。留心查辦。以期弊絕風清。方為不負委任。此係朕為整頓錢法起見。特為詳悉指示。該督撫務宜各矢天良。據實籌辦。若希圖錢局沾潤。藉詞含混。以致錢法日壞。私鑄充斥。朕必追究。來自何省。一經發覺。恐該督撫不能當其咎也。○又

諭。前因各省小錢充斥。曾經降旨通飭查禁。實力收繳。並令各關口一體留心查驗。俾私販咸知儆畏。第思

此等姦徒販賣。盈千累百。捆載遠行。必不肯由陸路  
販運。攜帶多糜運腳。致有虧折。總由水路行走。便於  
裝載。惟在責成各處關津。實力稽查。一體收繳。小錢  
方可淨盡。著傳諭各關監督等。於關津要隘處所。留  
心查驗。並設立收繳小錢之局。一律查收。曉諭各商  
等。赴關盡數呈繳。以清錢法。而絕弊源。○六十年

諭。各省小錢充斥。屢經降旨飭查收繳。而湖北省襄陽  
漢口地方。濱臨大江。為四川雲貴等省舟航輻輳之  
所。姦商聚集。尤為私販小錢弊藪。該撫惟當飭屬遵  
照節次諭旨。於漢口襄陽地方。認真查察。按捕務俾

小錢盡絕根株。肅清園法。實力遵循。方為妥善。儻將來仍有私販之案。恐該省督撫不能當其咎也。○嘉慶六年奏准。地方有小夥興販私鹽出境。或販賣入境。在十人以下者。每一起專管官住俸。兼轄官罰俸三月。俱限一年緝拏。限滿不獲。專管官罰俸一年。兼轄官罰俸六月。再限一年緝拏。如仍不獲。專管官降一級留任。兼轄官罰俸一年。鹽犯照案緝拏。如於限內拏獲過半者。免議。如被他人拏獲者。仍照例酌減議處。○又奏准。小夥興販一案之內。訊明同時或三起四起。各



販各私者。專管官降一級留任。兼轄官罰俸六月。俱限一年緝拏。限滿不獲。專管官降一級仍留任。兼轄官罰俸一年。再限一年緝拏。如仍不獲。專管官降一級調用。兼轄官降一級留任。鹽犯照案緝拏。○又奏准。小夥興販並未帶有軍器。臨時拒捕傷人者。該地方武職不能擒拏。專管各官仍照例議處。俱限一年緝拏。全獲開復。不能拏獲。專管官降二級。兼轄官降一級。仍留任。○又奏准。地方有大夥興販十人以上。帶有軍器。興販私鹽出境及入境販賣者。該地方專

管官降二級留任。兼轄官降一級留任。俱限一年緝拏。全獲開復。如限內不獲。專管官降二級調用。逸犯交與接任官緝拏。兼轄官降一級調用。逸犯交與接任官照案緝拏。於限內拏獲過半者。專管官減為降一級留任。兼轄官減為罰俸一年。如係他人緝獲者。該管官仍照例議處。○又奏准。大夥私梟。夥衆至十人以上。帶有軍器者。及二十人以上。雖未帶有軍器。而拒捕致傷兵役者。無論案內人犯。係一二起。或三四起。同時拒捕。均以大夥拒捕論。地方武職不能擒

等。專管官革職留任。兼轄官降二級。統轄官降一級。俱留任。戴罪限一年緝拏。全獲開復。如限內不獲。革職者。即行革任。降級者。俱照所降之級調用。逸犯交接管各官緝拏。如於限內拏獲過半者。專管官減為降二級留任。兼轄統轄各官俱改為降一級留任。如係他人拏獲。該管官仍照例議處。○又奏准。地方武職遇鹽梟入境興販。及有拒捕情事。故為疏縱。不即擒拏者。專管官革職。兼統各官均降二級調用。督撫提鎮不行題參。照徇庇例。降三級調用。○又奏准。地

方武職。專汎官一年內拏獲過境十人以上。不帶軍器。小夥私梟。每二起紀錄一次。兼轄官一年內統計所屬拏獲小夥五起者。紀錄一次。十起者加一級。○又奏准出產硫磺地方武職。如有私販。查係報部開挖之山。私煎硫磺出賣者。失察一次。專汎官降一級留任。兼轄官罰俸一年。未經報部之山。私行開挖煎賣者。失察一次。專汎官降一級調用。兼轄官降一級留任。其私煎硫磺偷漏出境。希圖販賣。沿途地方武職。失察在境販賣者。降一級留任。兼轄上司罰俸一

年。如止失察經由。並無販賣情事者。專汎武職  
罰俸一年。兼轄上司罰俸六月。○又奏准。出產  
硝斤地方。如有私販。查係收買積囤發賣者。失  
察一次。專汎官降一級調用。兼轄官降一級留  
任。若係偶然私煎。賣與過路客商者。失察一次。  
專汎官降一級留任。兼轄官罰俸一年。其私販  
硝斤出境。及沿途地方武職失察在境販賣者。  
降一級留任。兼轄上司罰俸一年。如止失察經  
由。並無販賣情事者。專汎武職罰俸一年。兼轄  
上司罰俸六月。○又奏准。湖北省宜昌府巡緝

川鹽。凡經由要隘。匯歸總要之處。令該管文武員弁。派撥兵役。督率巡緝。遇有川省私販偷越。協力追捕查拏。儻怠忽賄縱。分別查叅究辦。將該管文武員弁題叅。○又奏准江西省吉安府巡緝私鹽。均令於阜口等五處。設立卡巡查拏。凡山僻小徑要隘處所。多撥兵役。協同卡巡。常川巡緝。如能拏獲積窩巨販者。官兵敘賞。巡查不周。及有賄縱者。即行分別究叅。該管官弁一併查叅。○又奏准雲南省巡緝鄰境私鹽。凡經由津隘。匯歸總要處。分設員弁。酌帶兵役駐紮。

專司緝捕。儻該管員弁緝捕玩弛者。分別究叅。  
○又奏准。山東省巡緝私鹽。移蘭山南汛把總。  
駐山東江南兩省私鹽出入之龐家口。專司巡  
查。○又奏准。湖北省歸州。巴東。興山。長陽等州  
縣民戶。買食川鹽。每人不得過十斤。如有彙總  
承買。並藉端轉相貨賣。及別州縣民人越境影  
射私買者。失察之地方官。均照失察興販私鹽  
例議處。○又奏准。地方有私宰耕牛馬匹。該管  
官不行查拏。失察一二隻者。罰俸三月。四隻者  
罰俸六月。五隻以上者。罰俸九月。十隻以上者。

罰俸一年。三十隻以上者降一級留任。自行拏獲者免議。○十二年議定。地方如有姦民甫經製鑪做堆製造錢模。尚未鑄錢者。別經發覺。將失察之該地方武職降一級留任。○又議准。營兵煎販私鹽。失察之該管官。原例既議以革職。嗣後兼轄官定為降一級留任。統轄官定為罰俸一年。○又議定。承緝興販私鹽及販私拒捕之案。初叅應一律酌給四月為限。至承緝官未經限滿離任。接緝官仍勒限嚴緝。酌予處分。以重緝捕。嗣後凡興販私鹽及販私拒捕之案。接



任官如於初叅限內到任接緝者。一年限滿不獲。罰俸一年。再限一年緝拏。限滿不獲。再罰俸一年。鹽犯照案緝拏。如於初叅限外到任接緝者。一年限滿不獲。罰俸一年。鹽犯照案緝拏。○又議定。姦民私鑄私銷之案。如從前失於覺察。今能拏獲者。不論年月遠近。俱免其處分。若犯被文官拏獲。及交界處所拏獲。武職未經協拏者。仍照鄰境別汛之例減等議處。如僅獲為從之犯。而首犯及匠人脫逃者。止免其失察處分。仍照命案緝兇之例。勒限嚴緝。六箇月限滿不

獲承緝官住俸限一年緝拏。二叅限滿不獲。罰俸一年。再限一年緝拏。三叅限滿不獲。罰俸二年。再限一年緝拏。四叅限滿不獲。降一級留任。逃犯照案緝拏。如承緝官於初叅限內離任者。接緝官一年限滿不獲。罰俸一年。限滿不獲。再罰俸一年。逃犯照案緝拏。初叅限外。接緝官一年限滿不獲。罰俸一年。逃犯照案緝拏。承緝官因公出境者免議。○二十五年

諭孫玉庭叅奏玩縱私梟之將弁。請旨革職一摺。此案千總趙起鳳武舉沈定元奉派帶兵一百六十名。截

拏私梟船隻。乃於梟船駛過時。推令商人督丁往捕。轉自退入河灣。實屬畏葸。著俱斥革。交該督提同目兵縣快。嚴行審訊。審明照臨陣退縮例。定擬具奏。參將那朗阿。派委無能員弁。縱放私梟。並不親身督捕。著即革職。仍責令緝捕自效。以示懲儆。○道光三年諭。嗣後如有洋船夾帶鴉片煙進口。並姦民私種罌粟。煎熬煙膏。開設煙館。文職地方官及巡查委員。如能自行拏獲究辦。免其議處。其有得規故縱者。仍照舊例革職。若止係失於覺察。按其煙斤多寡。一百斤以上者。該管大員罰俸一年。一千斤以上者。降一級留

任五千斤以上者降一級調用。武職失察處分亦照文職畫一辦理。○九年

諭著粵海關監督嚴諭洋行各商嗣後各國夷人買賣俱令以銀易換制錢並於洋船進口時詳加查察如有夾帶夷錢不准開船飭令帶回如違惟洋商是問至依樣仿鑄及另立名號託為夷錢等弊尤應隨時稽察如有此弊即行查拏重究並將該管地方官嚴叅。○十二年

諭給事中邵正笏奏兩淮船板等船私鹽侵害浙鹽請飭妥議章程協力堵緝一摺著陶澍程祖洛林則徐

富呢揚阿悉心妥議。或照京口盤鹽廳之例。在於沿江隘口。移駐一二員弁。專司盤驗。或於三河之中。酌擇一河。通行舟楫。其餘二河以及支港。概釘木柵。不准通舟。或修建牆座。派委妥員。司其啟閉。以資捍禦。此外如鎮屬丹徒丹陽各口。濱臨大江。淮私直達。亦著籌畫堵截。章程具奏。又據稱常鎮二府。鹽行浙省。地屬江南。與松所事同一律。必須地方官協力巡查。並著陶澍等督率員弁。一體認真緝私。如有稍分畛域。膜視浙甌。准浙江巡撫據實叅奏。將該上司一體議處。至淮場漏私營弁。有故縱情弊。尤須嚴加考覈。

其浙商亦毋許藉詞諉卸。停運懈巡。總期於鹽務大有裨益。欽此。遵。

旨議准。孟瀆德勝。澡港三河。原為通潮灌田。現於澡港河之圩塘港口門。用黃石三條釘堵。每石中間三尺。俾通潮汐。以資灌溉。孟瀆河小河口馬橋地方。建牯一座。其新開之超瓢港口。暨德勝河魏邨港石牯。均一律設卡巡緝。○十六年

諭。圖法為經國重務。私錢充斥。百物騰貴。最為閭閻之害。不可不嚴行拏究。著兩江閩浙各督撫。通飭所屬。於開鑪時。嚴密查察。認真究辦。民間所用私錢。務究

其販自何人鑄自何處其島嶼私鑄著責成巡洋水師各將備實力按緝儻查有得賄庇縱情弊即行從嚴懲處其夾板商船如敢夾帶他項違禁物件尤當一律按查毋許疏懈。三十年

諭淮南鹽務全在漢岸疏銷而湖廣各州縣均居腹地鄰私處處可通現當整頓淮鹺之際若仍前梟販橫行甚至姦商亦藉官鹽為影射安望日有起色該處鹽務雖統歸兩江總督管轄而相隔既遙有鞭長莫及之勢且緝私係地方文武應辦之事著湖廣總督湖北湖南各巡撫嚴飭鹽道督率所屬不分畛域協

力查拏。每獲一起私鹽。具詳咨部。仍於一年期滿奏報銷引分數摺內彙覈。以憑稽考。如有查緝不力。或始勤終怠之員。即著嚴叅。毋得視為具文。以挽頽綱而懲積弊。○咸豐三年奏准。用兵之時。不法弁兵私

販硝磺。偷漏濟賊。及將存營差操硝磺。盜賣濟賊者。不分斤數。該管官知情故縱者。以同謀論。交刑部治罪。不知情者。該管官革職提問。兼轄官降五級調用。統轄官降四級調用。提督總兵降三級留任。如並無濟賊情事。而採辦硝磺。影射夾帶。重複販運者。出產地方專汛官及採辦



委員。知情故縱者革職治罪。不知情在百斤以上者革職。兼轄官降四級調用。統轄官降二級留任。提督總兵降一級留任。不及百斤者。專管官降三級調用。兼轄官降二級調用。統轄官降一級留任。提督總兵罰俸一年。若硝磺經過地方。該管官並不悉心稽查。任令放行。如有印票不符。及重複販運。並夾帶情事。別經發覺。將經過地方該管官降二級調用。兼轄官降二級留任。如係營兵得規包庇。將失察之該管官降三級調用。兼轄官降三級留任。關津渡口兵役人

等得規包庇。該管官知情故縱者革職拿問。不  
知情者革職。僱弁兵私販硝磺轉賣濟賊未出  
本境地方。該管官即首先訪獲及協同獲犯俱  
免其失察處分。如已出本境經鄰境別汛拿獲  
除訊出本地該管官實係知情故縱者仍照同  
謀律治罪外。若訊實係不知情將該地方官及  
各上司照例分別減等議處。如並無濟賊情事。  
該地方武職能將該犯並硝磺起獲如數不及  
百斤者紀錄一次。百斤以上者紀錄二次。一千  
斤以上者加一級。二千斤以上者加二級。三千

斤以上者加三級。五千斤以上者准其送部引見。若鄰境武職拏獲興販濟賊人犯罪應斬梟斬決者。每名加一級。三名以上者送部引

見。或獲犯不及三名而起獲硝磺。訊係濟賊在一千斤以上者。亦送部引

見。獲犯三名以上。並起獲硝磺三千斤以上者。由該督撫指定升階保奏。○四年議定。大夥私鑄。以上為大夥無論有無拒捕傷人。專汎官每起降二級留任。兼轄官每起罰俸一年。俱限一年緝拿。限滿不獲。專汎官照所降之級調用。兼轄官降

一級留任。私鑄拒捕。專汛官諱匿不報。或將數起報作一起者。俱革職。兼轄官降二級調用。統轄官降一級調用。如上司徇庇不叅。降三級調用。京城步軍統領衙門所屬汛地兵丁。及外省各營汛兵丁。如有徇隱。包庇受賄。賣放私鑄案犯等情。本管官故縱者。革職。止於失察犯該杖徒者。降一級調用。犯該軍流者。降二級調用。犯該斬絞者。降三級調用。上司失察者。每案降一級留任。若本管官自行訪出究辦者。免議。如兵丁以查拏私鑄為由。肆行搶奪。挾嫌誣告。失察

之該管官。照文職失察捕役誣良為盜例議處。已致死者革職。未死者降三級調用。係已革兵丁。已致死者降二級調用。未死者降一級調用。自行訪拏審出未致死者免議。已致死者仍照例議處。係匪徒冒充汛兵犯有前項情弊。將專汛官降一級留任。若姦民容隱私鑄人犯。專汛官故縱者革職。失於覺察者降一級調用。京外地方官失察私造鑄錢器具降一級調用。如尚未行用。即行訪拏與案犯並獲者。無論本境鄰境。每起加一級。如由在籍紳衿稟報。大夥私鑄。

得實者。給予加一級。係小夥並私造器具得實者。紀錄一次。鄰里軍民首告得實者。由地方官酌給獎賞。營汛武職拏獲大夥私鑄。將案犯全數緝獲者。無論本境鄰境。由該督撫等奏請給咨送部引。

見。照獲盜人員議敘。其並非大夥私鑄。地方官訪查破案。將首犯及匠人全獲者。如連獲三起以上。無論本境鄰境。由該督撫併案奏請給予升銜。其有失察處分。並將拏獲之案分起抵免。○五年

諭羅惇衍奏江南泰州仙女廟設立捐釐總局弁兵官紳多方阻滯刁難侵欺商船勒索挂號灰印等錢稍不遂意任意威嚇恐商販裹足與捐釐助餉章程有礙另片奏鵬船販運米石接濟賊營鎮江潮勇訛索商民包攬貨物等語江南省捐釐助餉前據侍郎王茂蔭御史宗稷辰奏稱局卡太多當經降旨查辦並據托明阿文煜奏稱並無私設捐局等事何以行之日久仍有官紳兵弁借盤詰稽查為名多樹旗幟巧立名色侵欺商販其為查禁不嚴致滋流弊已可概見著托明阿等嚴飭各路員弁如有藉端苛索者即

著從嚴拏辦。以免擾累。至鵬船運米濟賊。尤屬大干法紀。亟應杜絕。著托明阿向榮等。飭令督帶水師各員。嚴切訪查。如有前項情弊。即行嚴辦。以示懲儆。○

七年

諭刑部奏請飭嚴拏私鑄人犯等語。製造私錢人犯。屢經降旨嚴拏懲辦。乃近來直隸各州縣。犯案者仍復層見疊出。據刑部審明該犯等。皆係卹舍小民。即在麥場樹陰。開鑪私鑄。明目張膽。肆無顧忌。加以兵役人等。得賄包庇。聞拏逃逸者甚多。該地方文武員弁。竟至形同聲贖。毫無覺察。迨經步軍統領衙門派役



往捕。始趕往會拏。冀免處分。廢弛於前。取巧於後。實堪痛恨。著順天府直隸總督嚴飭所屬。認真拏辦。私鑄毋稍疏懈。如查有兵役人等得賄包庇者。即將失察員弁叅處。其由步軍統領衙門及鄰境訪獲者。該管上司務當查明該地方文武實係會同拏獲。方准奏免處分。不得事後彌縫。概稱協同拏犯。遽予末減。以杜取巧而示懲儆。

欽定大清會典事例卷六百二十

兵部

綠營處分例

衛田

屯田

捕蝗

解運

衛田○順治初年定衛所各官一年之內勸民開墾荒地五十頃以上者紀錄一次一百頃以上者加一級一百五十頃以上者加一級紀錄一次二百頃以上者加二級統俟水田六年旱田十年起科時該督撫取具印結題請議敘○又定衛所官有將未經開墾之地捏報開墾者革職若開墾後有復荒者將開墾議敘之加級

紀錄銷去。其開墾荒地。如有不照水田六年旱田十年起科之例。或先期勒徵。或過期不徵。或私減地畝。定額錢糧者。均革職。或不照起科定限。豫詳請徵。或勒令民人開墾地畝。或將新墾地畝。以多報少。以少報多。或將已報開墾之地。重複捏報開墾。均各降一級調用。或將荒熟地畝。不分析明白。混行造報。及將應徵在屯錢糧。不行查出者。亦降一級調用。至丈量地畝。遲延逾期。並派委監丈。互相推諉。不往。或將丈量地畝。詳報不清。及不送文冊。檄催又不申詳者。皆

罰俸一年。○又定。衛所開墾地畝錢糧徵收全完。取具印結題報。應隨奏銷錢糧一同具題。若有遲誤。照違限例議處。逾限一月者。罰俸三月。二月者。罰俸六月。三月者。罰俸九月。四五月者。罰俸一年。半年以上者。降一級留任。一年以上者。降二級留任。二年以上者。降三級調用。○又定。衛所被災田畝。該管官隨時詳報。夏災不逾六月。秋災不逾九月。如報災遲延。半月以內者。罰俸六月。一月以內。罰俸一年。一月以外。降一級調用。二月以外。降二級調用。三月以外者。革

職其被災分數。於題報情形之後。衛所官限四十日內查明造冊詳報。如不依限詳報。亦照被災逾限例議處。至妄報被災。及有災不報者。皆罰俸一年。報災之時。不送印結。及冊內不分析詳明。或止報巡撫。不報總督者。皆罰俸六月。○康熙十五年議准。衛所及武職各官。有隱匿熟地。及新墾地一畝至九畝。降四級調用。十畝以上革職。一頃以上革職。杖一百折贖。永不敘用。武進士武舉武生。隱匿一畝至九畝。黜革。十畝以上黜革。杖一百折贖。一頃以上黜革。杖一百

折贖。永不敘用。隱匿地畝入官。錢糧按年追徵。至各官失察隱匿熟地及新墾地至五十畝者。降一級調用。一頃降二級調用。一頃五十畝降三級調用。二頃降四級調用。二頃以上者革職。如先因清釐隱匿及開墾荒蕪有加級紀錄者。均准抵銷。此內有升遷降調休致告病已經離任者。經接任官查出。皆照現任官議處。已經革職者。如實係欺隱。仍行治罪。係失察者免議。

二十七年奉

旨。出首開墾地畝。不必拘定年限。均自出首之年徵收。

錢糧該管官免其議處。○乾隆二年議准衛所地方被災若距省寫遠詳報被災情形分數均扣算程途日期如詳報到省在限外而扣算程途日期尚未逾限者免其揭叅扣算已至逾限者各按遲延月日議處。○三年議准貴州省苗疆屯軍人等將官給屯田私自典賣與人該衛千總不行查出者罰俸一年至越界侵占苗人土田山場並砍伐竹木該衛千總失於覺察者降一級留任徇情隱匿不報者降三級調用。○又議准衛所倉廩該管官於滲漏處不行修補及應

蓋造倉廩。不詳請蓋造。以致米穀黴爛者革職。動帑代買。限一年照數追賠。限內不完。照損壞倉庫財物律治罪。如侵盜入己。捏稱黴爛虧欠者。照侵蝕例治罪。○嘉慶六年奏准。貴州省苗疆屯軍人等。將官給屯田私自典賣與人。該衛千總不行查出者。每一畝罰俸一年。○又奏准。軍丁回贖屯田。一年限內贖不及十分之二者。衛所官員罰俸二年。回贖二分以上者免議。回贖三分以上。衛所官員紀錄一次。捏報回贖不行查出者。降一級調用。各該同知有清軍之責。



一併照例議處議敘。○十二年議定。凡遇災荒之年。衛所官員並不詳報。及將成災報作不成災者。均革職永不敘用。如不實心確勘。少報分數者。革職。○道光三年奏定。衛所田地被災奉蠲錢糧。有已徵在官。不留抵次年錢糧。有未徵在官。不與扣除蠲免。一概混徵。以圖侵蝕。或於督撫具題之時。先行停徵十分之三。及部覆之後。題定蠲免分數。故將告示遲延。不即通行曉諭者。或稱止蠲起運。不蠲存留。使小民僅需其半。或將賑濟災民。及蠲免錢糧藉名肥己者。衛

所官俱革職提問。若將蠲免銀兩增多減少。造入冊內者。衛所官降二級調用。或被災之處。未經題免之先。誤報冊內填入蠲免者。衛所官罰俸一年。○又奏定。衛所應徵所屬寄莊花戶錢糧。於每年開徵之始。即查明開造邨莊戶名錢糧數目清冊。移交居住之州縣衛所代行催徵。如至奏銷未完。即將代徵之員。照正項地丁錢糧未完之例辦理。○又奏定。衛所經徵耗羨。務與正項隨同報解。若有未完。照正項地丁錢糧之例。按其未完分數。一律處分。○又奏定。衛所

官員如將已徵之錢糧作為民欠。或私自挪用。詭稱民欠。或加大耗及私派加徵。或豫徵次年錢糧。俱革職拏問。其豫徵錢糧。即准為次年應徵正項錢糧。○又奏定。衛所官徵糧一石。作銀一兩考成。將一應起運錢糧奏銷前如數全完。一千兩以下者。紀錄一次。一千兩以上三千兩以下者。紀錄二次。三千兩以上者。紀錄三次。如止完地丁錢糧。而本色顏料並一應雜項錢糧未完者。不准議敘。署事官奏銷前全完者。亦照此議敘。○又奏定。地丁錢糧經徵未完。衛所守

備千總。欠不及一分者。停其升轉。罰俸一年。欠一分者。降職一級。欠二分者。降職二級。欠三分者。降職三級。欠四分者。降職四級。俱留任。戴罪徵收。欠五分以上者。革職。其被叅衛所各官。限一年徵完。限內不完者。照原叅分數議處。原欠不及一分。限內不全完者。降一級留任。再限一年。如仍不全完。降一級調用。原欠一分。限內不全完者。降三級調用。如能完至八九釐者。降三級留任。再限一年。如仍不全完。降三級調用。原欠二分。限內不全完者。降四級調用。原欠三分。

限內不全完者。降五級調用。原欠四分以上者。限內不全完革職。其隨漕輕齎等項錢糧。衛所各官。經徵未完。亦照此分數議處。署印官。亦照正印官例處分。不及一月者免議。○又奏定。各省漕糧。經徵衛所官未完一分以上者。罰俸六月。二分以上者。住俸。三分以上者。降二級。四分以上者。降三級。五分以上者。革職。俱留任。戴罪督催。完日奏請開復。其違限不完者。應加倍議處。如應罰俸者。住俸。應住俸者。降二級。應降二級者。降四級。應降三級者。革職。俱留任。督

催完日奏請開復。應革職戴罪者。實降二級調用。至白糧考成。仍照漕糧例議處。署印官欠一分二分者。罰俸三月。欠三分四分者。罰俸六月。欠五分六分者。罰俸九月。欠七分八分者。罰俸一年。欠九分十分者。降一級調用。署印官不及一月。並欠不及一分者。免議。○又奏定。衛官捏告運官。侵欠糧石。希圖奪運。遲誤漕糧者。將捏告之衛官革職。○光緒六年奏准。嚴覈各項奏銷。各依定限。令各督撫。一面具題。一面先將未完各員名。開具簡明清單。專摺奏報。由部覈定。

處分。先行覆奏。仍各於題本內將具奏各員聲明備覈。其有奏後續完者。准其續行奏請歸本案開復。○十二年奏准。嗣後各省續報免議減議之案。以本案奏參閣鈔到部之日起限。其減免奏咨到部在三十日以內。即由戶部轉行兵部。於本案扣除。如在三十日以外。雖在戶部未經具奏之前。概歸另案覈議。

屯田○乾隆十七年

諭違例私將地畝典與民人之卡倫侍衛係犯罪之員。非尋常派出軍營者可比。著留軍營。俟三年期滿後。

再留三年。效力贖罪。嗣後有似此者。俱照此辦理。

三十一年奏准伊犁等處屯兵。每人收穫細糧

十八石者。將管屯官加一級。督催官紀錄二次。

二十八石者。管屯官加二級。督催官加一級。

三十一年奏准管理新疆等處刈挖銅斤。及經

管鐵局官員。除定數外。多交銅至三千斤。並得

鐵甚多者。均照屯田官員例議敘。四十九年

奏准伊犁塔爾巴哈台烏什等處並古城吉布

庫蔡把什湖牛毛湖屯兵。每名收穫細糧至十

八石。烏魯木齊庫爾喀喇烏蘇精河等處屯兵。



每名收穫細糧至二十石。喀喇沙爾。巴里坤等處屯兵。每名收穫細糧至十五石。哈密所屬塔爾納沁一屯。每兵收穫細糧至十四石以上者。專管之千總把總外。加一級。兼管官紀錄二次。統轄官紀錄一次。兵丁賞給一月鹽菜銀兩。如伊犁等處屯兵。收穫細糧至二十八石。烏魯木齊等處屯兵。收穫細糧至二十六石。並濟木薩。收成分數。報至二十分。再能加增。喀喇沙爾等處屯兵。收穫細糧至二十五石。塔爾納沁。收穫細糧至二十四石者。加倍議敘。伊犁。塔爾巴

哈台烏什古城吉布庫察把什湖牛毛湖烏魯  
木齊庫爾喀喇烏蘇精河等處屯田。僅收穫十  
五石以上。喀喇沙爾巴里坤等處。僅收穫十二  
石以上。塔爾納沁收穫至十二石者。均功過相  
抵。毋庸再議。如不及十五石十二石者。專管官  
降一級留任。外委官革去頂戴。兵丁量加責處。  
仍留屯所。督催兼管官罰俸一年。統轄官罰俸  
六月。視其次年收穫分數。如足數議敘者。准其  
開復。不准敘賞。其收穫之數。例應加倍議敘者。  
准照尋常收穫之例議敘。若次年收穫糧石。仍

不及數。專管官即照所降之級調用。外委官責革。兵丁重責。兼管官降一級留任。統轄官罰俸一年。至伊犁等處屯兵。如收穫不及十三石。烏魯木齊等處並塔爾納沁收穫不及十石者。專管之千總把總外委立行責革。兵丁重加責處。兼管官降一級調用。統轄官降一級留任。○又奏准新疆屯田遣犯。除巴里坤哈密二處俱與該處兵丁一例交糧。其勸懲之處。應照屯兵之例辦理外。至伊犁屯田遣犯。每名收穫細糧九石。烏魯木齊遣犯。每名收穫細糧六石六斗者。

每名日給白麵半斤。該管各官照屯兵收穫糧石之例減半分別議敘。伊犁屯田遣犯每名收穫十二石。烏魯木齊遣犯每名收穫十石者。每名日給白麵半斤。該管各官照屯兵收穫之例分別議敘。若伊犁遣犯每名收穫六石以上。烏魯木齊遣犯每名收穫四石以上者。准其功過相抵。如不及數。遣犯重責。該管官降一級留任。兼管官罰俸一年。其次年收穫多寡分別黜陟之處。悉照屯兵開復議處之例辦理。○又奏准管理新疆等處經管鐵局官員。除定數外。多交

鐵三萬六千斤者。照屯田官員例加一級。多交鐵至五萬斤者。將它鐵人等酌量賞賚。官員照屯田官員加倍例議敘。○又奏准烏魯木齊種地為民人犯。應交糧石。如於每年十月內能催完者。該管千總把總。照文職管理種地民人完糧之例議敘。如至年底催完。毋庸置議。若年內不能催完。照例議處。○嘉慶六年奏准。科布多屯田官兵收獲糧石。在八分以上者。專管官加一級。兼轄官紀錄二次。統轄官紀錄一次。如收穫糧石不及五分者。專管官降二級留任。兼轄

官罰俸一年。統轄官罰俸六月。○道光三年奏定。屯糧初叅經徵衛所等官。欠不及一分者停升。欠一分者。罰俸六月。欠二分者。罰俸一年。欠三分者。降俸一級。欠四分者。降俸二級。欠五分者。降職一級。欠六分者。降職二級。欠七分者。降職三級。欠八分者。降職四級。俱留任。戴罪徵收完日開復。欠九分十分者。俱革職。署印官欠一分二分者。罰俸三月。欠三分四分者。罰俸六月。欠五分六分者。罰俸九月。欠七分八分者。罰俸一年。欠九分十分者。降一級調用。署印不及一

月並欠不及一分者免議。○又奏定屯糧未完  
衛所官叅後俱限一年全完。如限內不完照原  
叅分數處分。欠八分七分年限內不能全完者  
革職。欠六分五分年限內不能全完者降五級  
調用。欠四分三分年限內不能全完者降四級  
調用。欠二分以上年限內不能全完者降三級  
調用。欠一分以上年限內完至八九釐者降三  
級留任。再限一年催徵。如不全完者降三級調  
用。限滿未完不及一分者停升。罰俸一年。○十  
八年

諭前據金和奏巴爾楚克屯田眷戶因委員等辦理不善以致紛紛逃回當有旨令恩特亨額查明叅奏並令將在屯商戶眷戶妥為安集茲據恩特亨額奏稱接據糧員稟報當即繕具安撫屯民告示委員前往確查並經面為曉諭仍令回歸屯所各安本業屯民欣然樂從等語巴爾楚克興辦屯田該屯地土廣沃歷年開墾著有成效即間有生鹵之處原可另覓佳壤儘力墾種何以紛紛呈訴均欲散去現據恩特亨額查明由於委員王傳書經理不善屯民迫於飢寒先有逃散之事復因遊擊福珠凌阿等未能妥為安



撫以致闔屯戶民。年年所借委員牛具籽種口糧等項。貧窮者無力歸還。豐稔之家亦復抗欠。希圖一闕而散。於屯務大有關礙。著恩特亨額即將辦理不善各員。據實參奏。毋稍徇隱。署參贊大臣金和於屯戶逃散。並不妥為安撫。任令該遊擊等傳集屯民。願留者出具甘結。願去者聽其自便。以致全屯紛紛欲散。有無偏聽妄為之處。並著查明參奏。該大臣仍傳集屯民。剴切曉諭。其有因地生鹵以及無力耕種之戶。即責成承辦委員。或另撥善地。或酌給籽種。並將逃散各戶。趕緊招回。分別安插妥善。毋致流離失所。以

副委任。○咸豐六年奏准。派往出兵及新疆等處屯種駐紮之把總外委等微弁。因案降革者。暫停開缺。於事竣之日。由軍營大臣暨該管各督撫將軍。詳加驗看。出具考語。咨部查覈。如該弁弓馬可觀。著有勞績。准將降革暫停開缺之案。改為降革留任。若人本平庸。不能得力。即行開缺。捕蝗。○乾隆六年奏准。衛所地方蝗蝻生發。該管官不即申報。上司者。革職。不親身實力撲滅。藉口鄰境飛來。希圖卸罪者。革職提問。至衛所及營員。奉上司差委協捕。不實力撲滅。以致養

成羽翼。為害禾稼者革職。○又奏准蝗蝻生發之處。能統率兵夫立時撲滅淨盡者。將該員紀錄一次。○十八年

諭蝗蝻為害甚大。朕屢敕督撫大員。躬親督率按捕。是以提鎮亦有協同往撲者。然若攜帶多人。需索供應。則農民轉受滋擾。捕蝗之害。更甚於蝗。此尤其大不可者。著通行傳諭知之。○三十六年議准嗣後武職各官。遇有蝗蝻生發。其不及早合力撲捕。以致長翅飛騰者。專汛官照例革職。該管上司不速催撲捕者。兼轄官降二級留任。統轄官降一級。

留任。提鎮罰俸一年。至武職兼統提鎮各官。有不行查報。及不移會督撫題叅者。兼轄官革職。統轄提鎮各官。降三級調用。○嘉慶六年奏准。武職員弁專汛地方。遇有蝗蝻生發。其不及早合力協捕。以致長翅飛騰。貽害田稼者。專汛官降二級調用。該管上司。仍照例分別議處。若兼統各官。不行查明申報。提督總兵者。降三級調用。提督總兵不移會總督巡撫題叅者。降二級調用。

解運。○乾隆十四年議准。運京銅鉛一到。該營

汛官弁即按站交替催趨。撥兵巡查。並將入境  
出境日期申報該省督撫稽察。若運官無故逗  
遛。及有盜賣情弊。亦即據實申報。儻知情代為  
隱瞞。照徇庇例降三級調用。○二十六年覆准  
凡銅鉛船入境。派委備弁親身押護。儻失察運  
官沿途偷盜。訛報沈溺者。一起罰俸六月。二起  
罰俸一年。三起降一級留任。四五起以上。降一  
級調用。知情故縱者。革職審究。如不行親往稽  
察。濫差兵役。捏結搪塞者。降三級調用。一年內  
有能拿獲偷盜二起者。紀錄一次。再有多獲。照

此遞加。○又奏准銅鉛船入境即報明該地方官查驗。至出境時即具印結申報該管上司。並知會接省地方一體盤查。如有在境盜賣捏報遭風失火情事。經過地方弁兵徇隱不報。別經發覺者。照糧船訛報漂沒汎地文武不親臨確勘例革職。○又奏准運京銅鉛船到汎遇有沈溺地方官失於防範。罰俸一年。仍於一年限內停其升轉。協同運員打撈限內撈獲過半者免議。如限滿無獲。或獲不及半者。罰俸一年。○三十一年奏准浙江省委武職前赴江南河南二

省採辦硝斤。定限六月運回。准其以到地之日。報明地方官起限。令該督撫飭令地方官協同委員採辦。並派丞倅人員嚴加督催。按依定限辦足運回。仍將委弁到境及運回各日期先行報部備查。如產硝之地方官不實力督同採辦。以及故為阻撓。並硝戶將硝偷漏等情。許委弁報明該管上司查催。或委弁不上緊採辦。或有意遲誤。該地方官即稟報本省督撫查叅。如委弁不能依期買運。降職一級。再限四月。照數辦回。倘再遲延。即行革職。若係故意遲延。即照遲

延例革職均留於彼省辦完方許回籍不准開復其產硝地方官如有瞻徇延誤一任過期不行辦竣初限不完將該地方官住俸限四月趕辦完竣准其開復如再逾限即降二級調用○四十一年覆准運京銅鉛船隻經過省分該省督撫專派遊擊都司守備等員查催押送如催趲不力以致抵通逾限即查取派出各員弁職名送部按其逾限時日議處如原限四日而行至五日以上者專催官罰俸一年六日以上者降一級留任八日者降二級留任九日以上者



革職留任其餘程限皆照此覈算。○五十年

諭錫船過境。如果有違例夾帶情弊。恐該地方官查出。擅行越站前進。自應查明奏。若並無情弊。則揚帆順流而下。正可多趨程途。以期迅速解到。遲固當議處。速亦致議處。則為解員者難矣。嗣後凡遇鉛錫等船過境。該督撫仍飭屬照例護送。如有因順風不及停泊越站前進。查無夾帶情弊者。止須將未經按站護送緣由。據實聲明報部。毋庸咨取委員職名附奏。

○五十九年奏准。凡運送銅錫鉛斤等船。在途沈溺。運員與地方專催協催督催各官。果能設

法全數撈獲者。各紀錄一次。○嘉慶六年奏准。運京銅鉛船入境。報明地方官查驗。至出境時。即具印結申報該管上司。該上司儻有勒捐稽遲者。降二級調用。其失察之該管各上司。降二級留任。○又奏准。浙江等省派委員弁赴隔省採辦硝磺。遠省限十月。近省限六月。鄰省限五月。本省限四月。辦完運回。准其照例起限。如限滿不能辦足。將該委員照例處分。原限十月者。再展限六月。原限六月者。再展限四月。原限五月者。再展限三月。原限四月者。再展限兩月。如

再逾限不完。將該委員革職。留於該省採辦事竣。押令運回。俟四年無過開復。若不上緊採辦。故意遲延。即行參奏革職。仍留該省採辦完竣。方許回籍。不准開復。至不趕緊協辦。並督催不力之地方文武各官。均交部查議。○又奏准各省委員採辦硝磺完竣。依限運回交營。如在途遲延。照運送銅鉛遲延之例。逾限不及一月者。降一級留任。一月以上者。降一級調用。二月以上者。降二級調用。三月以上者。降三級調用。四月以上者。降四級調用。五月以上者。革職。○十

二年議定。臺灣運解兵餉。原例定有限期。惟該處遠隔重洋。風信靡常。儻因守風信。致稽時日者。取具該管地方官印結報部。免其遲延處分。

○道光十七年

諭前據賀長齡奏。黔省歲運四起。京鉛酌擬歸併兩運。當有旨令戶部議奏。茲據該部奏稱。該撫係為鉛運迅速起見。請如所奏辦理。鉛斤為鼓鑄攸關。果能委用得人。自可刻期趲運。該省京鉛四起。改作兩起。運員等難保不以鉛數較多。藉詞延宕。又或以運費較繁。沿途濫行支借。不可不防其漸。著該撫遴委廉幹

委員分起督押。依限趕運交局。以免貽誤。並著沿途各督撫。責成文武員弁。認真稽查。嚴防船戶偷盜裝點等弊。○咸豐三年議准。弁兵採辦硝磺。經過地方。該管官並不悉心稽查。任令放行。如有印票不符。及重複販運。並夾帶情事。別經發覺。將經過地方該管官降二級調用。兼轄官降二級留任。如係營兵得規包庇。將失察之該管官降三級調用。兼轄官降三級留任。